

四庫全書

史部

欽定四庫全書

欽定續通志卷五百二十八

獨行傳

宋

劉庭式

巢谷

徐積

曾叔卿

劉永一

孫逢
喻汝礪

趙俊

劉化源

米璞
姚邦基
陰暉

張山翁

黃申

何時
陳子敬

劉庭式字得之齊州人舉進士蘓軾守密州庭式為通判初庭式議娶鄉人女既約未納幣庭式及第女以病喪明不敢復言或勸納其幼女庭式笑曰吾已心許之矣豈可負吾初心哉卒娶之生數子後死庭式喪之逾年不肯復娶軾問之曰哀生於愛愛生於色今君愛何從生哀何從出乎庭式曰吾知喪吾妻而已若緣色生愛緣愛生哀色衰愛弛吾哀亦忘則凡揚袂倚市目挑而心招者皆可以為妻也耶軾深感其言庭式後監太

平觀老於廬山絕粒不食目奕奕有紫光步上下峻坂如飛以高壽終

巢谷初名穀

按燕轍巢谷傳云至循州改名谷

字元脩眉州眉山人幼

傳其父中世學舉進士京師谷素多力見舉武藝者心好之遂棄其舊學蓄弓箭習騎射久之業成而不中第西去遊秦鳳涇原間所至友其秀桀於韓存寶尤善教之兵書熙寧中存寶為河中將有功會瀘州蠻乞弟擾邊命存寶出兵討之存寶不習蠻事邀谷至軍中問焉

及存寶得罪將就逮自度必死謂谷曰我死非所惜顧
妻子不免寒餓橐中有銀數百兩非君莫可使遺之者
谷許諾即變姓名懷銀步往授其子人無知者存寶死
谷逃避江淮間會赦乃出蘇軾謫黃州與谷同鄉幼而
識之因與之遊及軾與弟轍在朝谷浮沈里中未嘗一
見紹聖初軾轍謫嶺海平生親舊無復相聞者谷獨慨
然自眉山誦言欲徒步訪兩蘇聞者皆笑其狂谷竟往
至梅州遺轍書曰我萬里步行見公不意自全今至梅

矣不旬日必見死無恨矣轍驚喜曰此非今世人古之人也既見握手相泣已而道平生逾月不厭時谷年七十三將復見軾於海南轍愍其老且病止之曰君意則善然循至儋數千里當復渡海非老人事也谷曰我自視未即死也公無止我留之不可則資之行會有蠻隸

竊其橐裝以逃獲於新州谷從之至新遂病死

按燕轍樂谷傳

云有子蒙在涇原軍中故為作傳異日以授之

徐積字仲車楚州山陽人有孝行三歲父死旦旦求之

甚哀母使讀孝經輒淚落不能止事母至孝朝夕冠帶

定省

按宋名臣言行錄載嘗具公裳見貴官忽自思云見貴官尚如此豈有見母而不具公裳者乎遂晨

夕具公裳捐具母年過壯未娶或勉之答曰娶非其人必為母病予非敢忘嗣固有待也

從胡瑗

學所居一室寒一衲裘啜菽飲水瑗饋以食弗受應舉入都不忍捨其親徒載而西登進士第舉首許安國率同年生入拜且致百金為壽謝却之以父名石終身不用石器行遇石則避之不踐或問之積曰吾遇之則怵然傷吾心思吾親故不忍加足其上爾母亡水漿不入

口者七日悲慟嘔血廬墓三年雪夜伏墓側哭不絕音
翰林學士呂湊過其廬適聞之為泣下曰使鬼神有知
亦垂涕也甘露歲降北域杏兩枝合為幹既終喪不徹
筵凡起居饋獻如平生中年有瞶疾屏處窮里而四方
事無不知客從南越來積與論嶺表山川險易鎮戍疎
密口誦手畫若數一二自少及老日作一詩為文率用

腹藁口占授其子

按宋名臣言行錄云晚乃著書未成而病嘗曰吾之書大要以正治心以

直養氣而已或問立朝之要曰以正輔君或問修身之要曰以正修身

嘗借入書笈經宿

還之借者給言中有金葉積謝而不辨賣衣償之鄉人
有爭訟多就取決州以行聞詔賜粟帛元祐初朝廷詔
舉中外學官近臣合薦之乃以揚州司戶參軍為楚州
教授每升堂訓諸生聞者歛衽敬聽居數歲使者又交
薦之轉和州防禦推官改宣德郎監中岳廟卒政和六
年賜謚節孝處士官其一子

曾叔卿鞏族兄也家苦貧即存心不欺嘗買西江陶器
欲貿易於北方既而不果行有從之轉售者既受直矣

問將何之其人曰欲效君前策耳叔鄉曰不可吾聞北方新有災饑此物必不時泄故不以行余豈宜不告以誤子其人即取錢去居鄉介潔一介不取妻子困於饑寒而拊庇孤惇唯恐失其意起家進士至著作佐郎熙寧中卒

劉永一陝州夏縣人孝友廉謹熙寧初巫咸水溢入縣城民多溺死永一持竿立門前見他人物流入者輒撿出之有僧寓錢數萬於其室無何僧死永一詣縣自言

請以錢歸其弟子鄉人負債不肯償立焚其券行事類
此兄大為醫助教居親喪不飲酒食肉終三年司馬光
傳之以為令士大夫所難

孫逢眉山人大觀四年進士累官至太學博士張邦昌
僭立有司趣百僚入賀逢獨堅卧不起時祠部員外郎
喻汝礪聞變捫其膝曰不能為賊臣屈遂掛冠去事畢
有司舉不至者欲以逢與汝礪復於金人邦昌以畢至
告乃免逢聞之曰是必將肆赦遷官以免我我其可竢

遂發疾而卒

按本傳以下諸人宋史原入忠義今因其未經殉難與慷慨授命者不同而志行卓

然入之獨行洵為無媿今移載於此

趙俊字德進南京宋城人紹聖四年進士官至朝奉郎
隱居杜門雖鄉里不妄交劉安世無恙時居河南暇則
獨一過之徐處仁與俊厚善及為丞相鄉人多見用俊
未嘗往求處仁亦忘之獨不得官建炎末士大夫皆避
地俊獨不肯曰但固吾所守爾死生命也避將安之衣
冠奔踣於道者相繼俊晏然不動劉豫以俊為虞部員

外郎辭疾不受以告畀其家卒卻之如是者三豫亦不復彊凡家書文字一不用豫僭號但書甲子後三年卒
贈承直郎

劉化源米璞皆耀州人化源紹聖元年進士建炎初金人入關陝守令以城降者金人因而命之化源時知隴州不肯降城陷被執金人使人守之不得死遂驅入河北驚蔬果隱民間者十年終不屈辱璞登政和二年進士第時通判原州劉豫欲官之杜門謝病卒不污僞命

時有鳳翔教授陰倬亦守節不仕又尉氏知縣姚邦基
蜀人也秩滿不復仕屏居村落授徒自給以終時宗室
不及南渡者尚散居民間豫募人索之承務郎閻琦匿
不以聞為人所告豫杖之死

張山翁字君達普州人景定三年進士德祐元年為荆
湖宣撫司幹官鄂守張晏然議納款山翁以書譙讓之
晏然既降山翁被執軍前諭曰若降不失作顯官山翁
酬對不屈行省官賈思貞義之貸不殺後居黃鵠山聚

徒教授而終

黃申字酉鄉井研人開慶元年進士歷官樂安丞為政
廉謹有治聲元兵徇撫州下諸縣索降狀樂安令率其
僚聯署以上申獨抗不往令遣吏民數百人彊輿致之
申顛踣於地若中風然令無如之何至暮衆舁之寘中
堂翼日或食以粥得免遂去隱巴山中以終

何時字了翁撫州樂安人文天祥同年進士也調廬陵
尉歷知興國縣天祥起兵辟署帥府機宜帶行監文思

院天祥入衛時任留司分司吉州饒運元兵下吉州時
脫身歸鄉里益王五天祥開府劔南時起兵趨興國復崇仁
縣未幾元兵奄至兵敗削髮為僧賣卜自給變姓名自
號堅白道人又有陳子敬者贛州人嘗從天祥遊天祥
開閩汀州子敬募集民兵屯阜口及天祥攻贛子敬與
合謀忠效甚著空坑兵敗復聚兵屯黃塘砦砦潰子敬
不知所終

欽定續通志卷五百二十八

欽定四庫全書

欽定續通志卷五百二十九

獨行傳

遼

蕭札拉

耶律官努

蕭幹

蕭都勒幹

蕭普爾普

蕭札拉字實訥北府宰相巴雅爾之弟性介特不事生業保寧聞以戚屬進累遷寧遠軍節度使秩滿里居淡

泊自適統和末召為南京馬步軍都指揮使以疾求退
不聽遷伊勒希巴又以疾辭許之還入頡山杜門不出
帝嘉其志不復徵札拉自是家於頡山親友或過之終
日言不及世務凡宴游相邀亦不拒一歲山居過半與
世俗不偶耶律資忠重之目曰頡山老人卒

耶律官努字奚隱林牙幹魯之孫沉厚多學詳於世系
嗜酒好佚初徵為宿直將軍重熙九年以疾去官帝以
官努屬尊欲成其志乃許自擇一路節度使官努辭曰

臣愚鈍不任官使加歸義軍節度使輒請致政官努與
烏哩特部人蕭幹友善幹謂官努曰仕不能致主澤民
成大功烈何屑屑為也吾與若居林下以枕簟自隨觴
詠自樂雖不官無慙焉官努然之時稱二逸乾統間官
努卒

蕭都勒幹字薩巴皮室詳袞頁嚕之弟幼警悟異常兒
三歲失母哭盡哀見者傷之及長魁偉沈毅好學善屬
文有才幹年三十始仕為朝野推重給事北院知聖旨

事太康二年伊蘓再入樞府都勒幹素與蕭巖壽善誣以罪謫戍西北部坐皇太子事特恩減死仍錮終身在戍十餘年太子事稍直始歸鄉里屏居謝人事一日臨流聞雉鳴王復孔子時哉語作古詩三章見志當時名

士稱其高情雅韻不減古人壽隆六年卒乾統初贈彰

義軍節度使

按遼史載獨行三人謂不淫於富貴不誣於聲利今于列傳中採其志節相同者復

得蕭都勒幹一人仍按時代次之謹載

蕭普爾普字托羅魏國王惠四世孫父母蚤喪勒於祖

父烏爾古納性孝悌年十三烏爾古納卒自以早失怙恃復遭祖喪哀毀踰禮族里嘉歎嘗謂人曰我於親不得終養今誰為訓者苟不自勉何以報鞠育恩自是力學於文藝無不精乾統間以烏爾古納之故名之不應當於親識游獵山水奉養無長物僕隸欣欣如也或曰公胡不念嗣先世功名答曰自度不足以繼先業年踰強仕安能益主庇民累徵皆以疾辭晚年謝絕人事卜居瑪古山屏遠葦茹潛心佛書延有道者談論彌日人

問所得何如但曰有深樂惟覺六鑿不相攘餘無知者
一日易服無疾而逝



欽定續通志卷五百二十九

欽定四庫全書

史部

欽定續通志卷五百

三十五

侍講學士_臣羅國俊覆勘

總校官原任侍講臣王燕緒

欽定四庫全書

欽定續通志卷五百三十一

循吏傳

臣等謹案循吏之名例沿史漢義取悃幅無華奉職循理興教化勸農桑弭盜賊而已是以前漢止取文翁等六人而若趙張三王之能於其職尹翁歸之擊斷鮑宣之不畏彊禦不與馬至如韓延壽之閉閤自責興起禮讓亦不與馬去取之間例綦

嚴已舊唐書之良吏傳新唐書刪去二十餘人蓋
有見乎此遼史名能吏傳故若楊遵勗之剖決如
流王崇之練達朝政亦皆採入揆諸循良之名稍
為不協今概從淘汰一以循吏為名以符鄭志之
例焉

唐

韋仁壽

陳君賓

張允濟

李桐客

李素立

至遠

薛大鼎

賈敦頤

敦實

田仁會

裴懷古

韋景駿

揚茂謙

李惠登

羅珣

蕭定

韋丹

宙

盧弘宣

薛元賞

何易于

韋仁壽京兆萬年人隋大業末為蜀郡司法書佐斷獄
平得罪者皆自以不寃高祖入關遣使者徇定巴蜀承
制擢仁壽雋州都督府長史南寧州納款朝廷歲遣使
安撫至率貪黷邊人苦之多叛去高祖素聞仁壽治理

詔檢校南寧州都督寄治越雋歲一按行慰撫之仁壽
將兵五百人循西洱河開地數千里承詔置七州十五

縣

舊書作八州十七縣

即授其酋豪為牧宰威令簡嚴人皆安悅

將還酋長泣曰天子藉公鎮撫奈何欲去我仁壽以池
壁未立為解諸酋即相率築城起廨舍旬日而就仁壽
乃告以實曰吾奉詔撫循庸敢擅留父老悲啼祖行遣
子弟隨貢方物天子大悅仁壽請徙治南寧假兵鎮撫
詔可敕益州給兵護送刺史竇軌疾其功誅言蜀中山

獠方叛未遑遠畧不時遣歲餘病卒

陳君賓陳鄱陽王伯山子也仕隋為襄國太守武德初
挈郡聽命封東陽郡公遷邢州刺史貞觀初徙鄧州州
丞喪亂後百姓流離君賓加意勞徠不替月皆還復業
明年四方霜潦獨君賓所治有年儲倉充羨蒲虞等州
民就食其境太宗下詔勞之曰去年關內六州穀不登
糧儲既少令民析房逐食比聞刺史與百姓識朕此懷
務相安養還時各有贏糧並出布帛贈行者如此用意

嘉歎良深一則水旱常數更相拯贍不慮凶年二則禮讓興行海內皆為兄弟變澆薄之風朕顧何憂已命有司錄刺史以下功最百姓養戶免今年調物是歲入為太府少卿轉少府少監坐事免起為虔州刺史卒

張允濟青州北海人仕隋為武陽令以德教訓民多異政元武民有以牸牛依婦家者久之孳十餘犢將歸而婦家不與民訴縣縣不能決乃詣武陽允濟曰若自有令吾何與民泣訴其抑允濟因令左右縛民蒙其首過

婦家村中云捕盜牛者命盡出民家牛詰所從來婦家不知遽曰此壻家牛我無預即遣左右撒蒙曰可以此牛還壻婦家叩頭服罪元武吏大慙允濟嘗道逢老母蒔葱結廬守之因教曰第還舍脫有盜當告令媪如其言俄大亡葱允濟悉召十里內男女驗問果得盜者有行人夜發遺袍道中行十餘里乃寤或謂曰吾境內不拾遺可還取之如言果得袍遷高陽郡丞郡缺太守獨統郡事吏下畏悅賊帥王湏拔攻郡於是糧屈吏食槐

葉藁節無叛者貞觀初累遷刑部侍郎封武城縣男出
為幽州刺史卒

李桐客冀州衡水人仕隋為門下錄事煬帝在江都以
四方日亂謀徙都丹陽召羣臣議左右希意以為江左
且望幸若巡狩勒石紀功復禹舊迹此其時也桐客獨
曰吳會卑濕而狹不足奉萬乘給三軍且踰越險阻非
社稷福御史劾以謗毀幾得罪而免後隋滅為宇文化
及脅至黎陽轉陷寶建德賊平太宗召授秦府法曹參

軍貞觀初累為通巴二州刺史治尚清平民呼為慈父
後卒於家

李素立趙州高邑人曾祖義深仕北齊為梁州刺史父

政期

按新書宰相世系表水部郎中政期係素立之父而政藻則為宜州長史乃其伯也本傳訛為父政

藻今據改

為隋水部郎使淮南為盜所殺素立武德初擢監

察御史民有犯法不及死者高祖欲殺之素立諫曰三尺法天下所共一動搖則人無以措手足方大業經始奈何輦轂下先棄刑書帝嘉納由是恩顧特異以親喪

解官起授侍御史貞觀中轉揚州大都督府司馬初突厥鐵勒部內附即其地為瀚海都護府詔素立領之時

闕疑熟

舊者作闕泥孰

別部數梗邊素立遣使諭降夷人感其

惠率馬牛以獻素立止受酒一柸歸其餘乃開屯田立廨署厯太僕鴻臚卿累封高邑縣侯出為綿州刺史永徽初徙蒲州將行付所餘糧儲并什器于州唯齋書籍就道會卒高宗特廢朝一日謚曰平其孫至遠始名鵬素立方奉使謂家人曰古有待事名子吾此役可命子

孫矣遂以名之少秀悟治尚書左氏春秋令狐德菜以
良史許之始調蒲州參軍累擢監察御史裏行忤貴倖
外遷久乃厯司勳吏部員外郎中遷天官侍郎知選事
疾令史受賄多所絀易吏肅然飲手其知選以內史李
昭德薦或勸其往謝答曰李公以公用我奈何欲謝以
私卒不詣故昭德銜之出為壁州刺史卒至遠父休烈
亦有文終鄭令至遠友兄弟事寡姊有禮世稱其德弟
從遠清密有學神龍初厯中書令太府卿累封趙郡公

謚曰懿兄弟皆德望相埒至遠子奮字玉田少聰警初
厯汜水主簿遇事敏速雖廝豎一閱輒記姓名以路敬
潛薦擢右臺監察御史裏行累轉國子司業事母謹累
世同居長幼有禮奮妻卒時母先病恐母悲傷約家人
無以哭聲聞母所朝夕省侍不見憂色母終哀毀而卒
從遠子巖年十餘歲會中宗祀明堂以近臣子弟執籩
豆巖進止中禮授右宗衛兵曹參軍厯洛陽尉累遷兵
部郎中癸扶風兵應姚嵩稱旨遷諫議大夫封贊皇縣

伯終兵部侍郎巖善草隸為參軍時製一裘服之終身
薛大鼎字重臣蒲州汾陰人父粹為隋介州長史漢王
諒反授絳州刺史諒敗坐誅大鼎以幼免死配流辰州
用戰功得還高祖兵興謁見龍門因說帝直渡龍門就
食永豐倉傳檄遠近據天府為拊背扼喉計帝竒之時
諸將已決策先攻河東其議遂寢授大將軍府察非掾
出為山南道副大使開屯田以實倉廩趙郡王孝恭討
輔公柝授大鼎饒州道軍師以功遷浩州刺史累徙滄

州界有無棣河久塞大鼎浚治引魚鹽於海民歌曰新
溝得通舟楫利直達滄海魚鹽至昔日徒行今騁駟美
哉薛公德滂被又疏長蘆漳衡三渠泄汙潦水不為害

時鄭德本在曹州賈敦頤為瀛州

按舊書作瀛州刺史
賈敦頤曹州刺史鄭

德本據敦頤傳亦稱刺瀛州新書本傳訛
為德本在瀛州敦頤為冀州今據舊書改

皆有治名故

河北稱鰲脚刺史永徽中遷銀青光祿大夫行荊州大
都督長史卒謚曰恭子克構克勤克構有器識天授中
官至麟臺監克勤歷司農少卿為來俊臣所陷被殺克

構坐竄死嶺南

賈敦頤曹州冤句人貞觀時數歷州刺史在職廉潔入
朝常盡室行乘一敝車羸馬繩羈見者不知其刺史也
久之為洛州司馬以公累下獄太宗貴之徙瀛州刺史
州瀕滹沱河及滙水歲泛溢壞室廬敦頤為立堤堰自
是州無水患其弟敦實時為饒陽令舊制大功嫌不連
官朝廷嘉其兄弟治行故不徙以示寵永徽中遷洛州
洛豪右占田多踰制敦頤括三千餘頃以賦貧民發奸

摘伏下無能欺卒於官弟敦實貞觀中為饒陽令政化
清靜民懷之咸亨初遷洛州長史甚有惠政洛陽令楊
德幹酷烈杖殺人以立威敦實常喻止曰政在養人傷
生過多雖能不足貴也德幹為衰減始洛陽人為敦頤
刻碑大市及敦實入為太子右庶子人復為立碑其側
號常棣碑歷懷州刺史有美蹟永淳初致仕卒年九十
餘子膺福天授中歷左散騎常侍昭文館學士以實懷
貞黨坐誅

田仁會雍州長安人祖軌隋幽州刺史封信都郡公父
弘襲封至陵州刺史仁會武德初擢制舉累遷左武侯
中郎將太宗征遼薛延陀以數萬騎掩河內詔仁會與
執失思力率兵擊敗之尾逐數百里帝降璽書嘉慰永

徽中為平州刺史務農勸學政稱善徙郢州

按新書誤以自暴祈

雨系之平州下
今據舊書移正

歲旱自暴以祈而雨大至穀遂登郡人

歌之五遷勝州都督境有風賊依山剽行人仁會發騎
盡捕殺之自是道無寇跡入為太府少卿遷右金吾將

軍所得祿佑有贏輒入之官人以為尚名然資彊摯疾惡晝夜循行有絲毫姦必發廷中譴罰日數百京師無貴賤舉憚之有女巫傳鬼道惑衆自言能活死人市里以為神仁會劾徙以邊轉右衛將軍以年老致仕卒謚曰威子歸道明經及第累擢通事舍人內供奉轉左衛郎將突厥默啜請和武后詔將軍閻知微持節往冊可汗默啜又遣使謝知微遇諸道即與緋袍銀帶因表請使到日備禮廷賜歸道諫曰突厥背惠積年今悔過入

朝宜待天旨而知微擅賜袍帶朝廷何以加之望敕反
初服以須朝命且小國使者不勞備禮迓之后從焉默
啜將至單于都護府詔歸道攝司賓卿往勞默啜請六
胡州及都護府地不得大怨望執歸道將害之歸道色
不撓且讓之為陳禍福默啜亦悔會有詔賜默啜粟三
萬石綵五萬段農器三千且許結婚於是歸道得還遂
具陳默啜不臣狀請備邊已而果反乃擢歸道夏官侍
郎益親信遷左金吾將軍司膳卿押千騎除殿中監宿

衛玄武門桓彥範等誅二張歸道不豫聞及索騎士拒
不應事平彥範欲誅之以辭直免還私第中宗壯其守
召拜太僕少卿遷殿中少監右金吾將軍卒贈輔國大
將軍追封原國公諡曰烈

裴懷古壽州壽春人儀鳳中詣闕上書補下邳主簿頻
遷監察御史姚萇蠻叛詔懷古馳驛往撫之申明誅賞
歸者日千計俄縛首惡遂定南方蠻夏立石著功恒州
僧淨滿為其徒誣告祝詛不道武后命按誅之懷古得

其枉為之中訴后怒懷古奏曰陛下法當與天下畫一
豈使臣殺無辜以希旨哉使淨滿有不臣狀臣何能寬
之后意乃解閣知微使突厥懷古監其軍默啜脅知微
稱可汗又欲官懷古懷古不從將殺之抗辭曰寧守忠
而死不毀節以生請就斬乃囚之軍中因得亡去宛轉
山谷以歸遷祠部員外郎姚嵩酋等叩闕願得懷古為
牧守遂拜姚州都督以疾辭轉司封郎中時始安賊歐
陽倩衆數萬剽没州縣以懷古為桂州都督招慰討擊

使未踰嶺先飛書諭以禍福賊迎降自陳為吏侵而反
懷古知其誠乃輕騎赴之或曰獠夷難親未可信答曰
忠信可通神明况人耶至其壁撫諭倩等大喜悉歸所
掠諸洞素翻覆者皆牽連款附嶺外悉平徙相州刺史
并州大都督長史所至吏民懷愛神龍中以左羽林大
將軍召未至官復授并州郡人攜扶老稚出迎崔宣道
始代為長史亦野次懷古不欲厚愧宣道使人驅迎者
還而來者愈衆得人心類如此俄轉幽州都督召為左

威衛大將軍卒於官

韋景駿雍州萬年人司農少卿宏機曾孫

按舊書韋宏機傳載宏機

子餘慶餘慶子岳岳子景駿則景駿係宏機曾孫矣新書本傳誤為孫今改正

中明經神龍中

歷肥鄉令縣北瀕漳連年泛溢舊防迫漕渠雖修築隨

即壞決景駿相地勢益南千步因高築堤水不為患而

隄北遂為腴田漳水舊有架柱長橋景駿改為浮梁功

少費約後遂為法河北饑身巡閭里勸通有無贍恤貧

弱縣民獨免流離及去人立石著其功開元中為貴鄉

令有母子相訟者景駿曰令少孤常自痛爾幸有親何得如此教之不孚令之罪也因嗚咽流涕付授孝經使習大義於是母子感悟請自新遂稱慈孝當時治有名者景駿與清漳令馮元淑臨洺令楊茂謙三人景駿後為趙州長史道出肥鄉民爭奉酒食迎犒有小兒數輩與馬景駿曰吾去時兒曹未生非有舊思何故來咸對曰耆老為我言學廬館舍橋郭皆公所治意公為古人今幸親見所以來景駿為留終日後遷房州刺史州帶

山谷俗參蠻夷無學校而好淫祀景駿為諸生貢舉通

隘道作傳舍罷祠房無名者民甚便之轉奉天令未行

卒茂謙

按新書韋景駿傳後附載楊茂謙事蹟而卷目失載今補注

清河人擢制舉

授左拾遺出為臨洺令為吏介而勤擢秘書郎始竇懷

貞雅重其材及執政薦為大理正左臺御史中丞開元

初出為魏州刺史河北道按察使與司馬張懷玉同鄉

初相善洎晚有隙遂相訐短長左遷桂州都督徙廣州

卒景駿子迷自有傳

李惠登營州柳城人

舊書作平盧人

少為平盧軍裨將安祿山

亂從董秦泛海略定滄棣等州輕兵遠闕賊戰輒北史

思明反惠登陷賊以計脫走山南依來瑱表試金吾衛

將軍李希烈反授兵二千使屯隨州惠登挈州以歸即

拜刺史州數被亂野荒不治惠登雖朴素無學術而視

人所利行之所害去之率心所安暗與古合居二十年

田畝閭戶口日增人歌頌之於是節度使于頔狀其績

詔加御史大夫升隨為上州俄檢校國子祭酒卒贈洪

州都督

羅珣越州會稽人寶應初詣闕上書為太常寺太祝曹
王臯領江西荆襄節度署置幕府累遷副使臯卒軍亂
劫府庫珣取首惡十餘人斬以徇而貫其餘黨召為奉
天令時中官出入相係於道吏緣以犯禁珣痛笞之自
是屏息擢廬州刺史民間病者捨醫藥禱淫祀珣下令
止之修學宮政教簡易淮南節度使杜佑上其治狀賜
金紫服再遷京兆尹請減平糶半以常賦充之人賴其

利以老病求解徙太子賓客累封襄陽縣男卒諡曰夷
子讓字景宣以文學著舉進士宏辭賢良方正皆高第
為咸陽尉父喪幾毀滅服除布衣糲飯不應辟署十餘
年淮南節度使李鄜即所居敦請置幕府除監察御史
累遷御史中丞有仁惠名或以婢遺讓問所從答曰女
兄九人皆為官所賣留者獨老母耳讓慘然為焚券召
其母歸之入為散騎常侍拜江西觀察使卒贈禮部尚
書

蕭定字梅臣宋國公瑀之曾孫以蔭授陝州參軍金城丞莅事清幹黜陟使裴遵慶表為判官調萬年主簿歷左右司郎中為元載所惡外遷州袁潤等六州刺史所至有政聲大厯中有司差天下刺史治績定與常州蕭復豪州張鎰為第一而勸農桑均賦稅招輯流亡定又在鎰復右遷戶部侍郎太常卿朱泚反變姓名為張誕匿里中與蔣況俱不浼於賊事平擢太子少師卒贈太

子太師

按蕭定舊書列於良吏新書則附在蕭瑀傳後今仍改入循吏

韋丹字文明京兆萬年人周大司空孝寬六世孫高祖
琨以洗馬事太子承乾諫不聽太宗才之擢給事中後
封武陽縣侯卒諡曰貞丹蚤孤從外祖顏真卿學擢明
經調安遠令以讓其兄復舉五經高第歷咸陽尉新羅
國君死詔拜丹司封郎中往弔故事使外國賜州縣十
官賣以取貲丹曰使外國不足於資宜上請安有貿官
受錢即具奏帝命有司與之著為令未行而新羅立君
死還為容州刺史教民耕織止惰游興學校民貧自鬻

者贖歸之禁吏不得掠為隸始城州周十三里屯田二十四所教種茶麥仁化大行遷河南少尹未至徙義成軍司馬召為諫議大夫有直名劉闔反議者欲釋不誅丹上疏以為孝文世法廢人慢當濟以威請誅闔憲宗褒美會闔圍梓州乃授丹劔南東川節度使代李康至漢中上言康守方盡力不可易召還拜晉慈隰州觀察使封咸陽郡公開歲奏所治三州非要害地不足張職為國家費請屬之河東帝從之徙為江南西道觀察使

丹計口受俸委餘於官罷八川冗食者始民不知為瓦
屋草茨竹椽久燥則焚丹召工教為陶聚材於場人能
為屋者受材瓦於官免半賦徐取其償逃未復者官為
之貧不能者畀以財身往勸督置南北市為營以舍軍
歲中早募人就功厚與直給其食為衢南北夾兩營東
西七里即廢倉為新廡以息馬築堤扞江長十二里凡
為陂塘五百九十八所灌田萬二千頃有吏主倉十年
丹覆其糧七三千斛籍其家盡得文記乃權吏所奪丹

召諸吏曰若恃權取於倉罪也與若期一月還之皆頓首謝及期無敢違有卒違令當死釋不誅去而上書告丹不法詔丹解官待辨會卒驗卒所告皆不實丹在江西德被八州歿四十年民思之不忘太和中裴誼觀察江西上言為丹立祠刻石紀功不報宣宗時周墀復言之乃詔刻功於石子宙推蔭累調河南府司錄參軍宣宗錄丹後拜宙侍御史三遷度支郎中盧鈞節度太原表宙為副時回鶻入塞下剽殺吏民鈞欲得信重吏視

邊宙請往自定裏鴈門五原絕武州塞略雲中踰句注
徧見酋豪撫諭之視亭障守卒增其稟約吏不得擅以
兵侵諸戎犯者死於是三部六蕃諸種皆信悅召拜吏
部郎中出為永州刺史俗不知法為書制律戶曉之歲
歛斥官供刺史什用得九十餘萬錢為市糧餉州負嶺
轉輸艱險每饑人輒莩死宙始築常平倉收羨餘以待
乏罷冗役九百九十四員縣舊置吏督賦宙俾民自輸
家十相保常先期湘源歲供零陵香人苦之宙為奏罷

民貧無牛宙為置社二十家月會錢若干探名得者先
市牛以是為準久之牛不乏立學官取仕家子弟十五
人充之初俚民婚娶集賓客會飲多至數百人力不足
則不迎或至淫奔宙條約使略如禮其敝俗一切禁絕
遷為大理少卿久之拜江西觀察使遷嶺南節度使南
詔陷交趾撫兵積備以幹聞加檢校尚書左僕射同中
書門下平章事咸通中卒弟岫字伯起仕至福建觀察
使亦有名

盧弘宣字子章元和中擢進士第鄭權帥襄陽辟署幕
府李愬代權二人交憾弘宣謁愬愬敕左右謹衛既與
語見其冲遠不覺洗然裴度留守東都表為判官累遷
給事中駙馬尉韋處仁拜虢州刺史弘宣謂非所任還
詔不下開成中山南江西大水詔弘宣與吏部郎中崔
璠分道賑濟還遷京兆尹刑部侍郎拜劔南東川節度
使時歲饑劇盜為亂偽署官吏發教諭招亡命聯蓬瀛
嘉榮諸州根株磐熾弘宣撤諭賊黨稍降其黠者署軍

中孱無能者還之農魁長逃入峽中悉捕誅之徙義武節度使弘宣性寬厚悉除苛法人便之然犯者亦不貸初詔賜其軍粟三十萬斛貯飛狐弘宣計輓費不能滿直敕吏守之明年春大旱教民隨力往取時幽魏饑甚獨易定自如至秋悉收所貸軍食以饒厯工部尚書祕書監以太子少傅致仕卒贈尚書右僕射弘宣患士庶家祭無定儀乃合十二家法損益之次以為書云

薛元賞失其里系太和初自司農少卿出為漢州刺史

時李德裕為劍南西川節度使會維州降德裕受之以聞牛僧孺沮其議元賞上書極言可因撫之以潰其膺腹不省段文昌代德裕狀元賞治當最累遷司農卿京兆尹出為武寧節度使罷泗口獮稅人以為便俄徙郊寧會昌中德裕當國復拜京兆尹都市多俠少年剽斂坊閭元賞到府三日收惡少杖死三十餘輩陳諸市餘悉斂迹元賞長吏事嘗條時弊上之禁屯怙勢擾府縣元賞數與爭由是軍士折戢百姓賴安就加檢校吏部

尚書閱歲進工部尚書領諸道鹽鐵轉運使弟元龜以德裕薦為京兆少尹宣宗立罷德裕而元龜坐貶元賞亦下除袁王傅久之復拜昭義節度使卒

何易于不詳何所人為益昌令縣距州四十里刺史崔朴常乘春與賓屬汎舟出益昌旁索民挽絆易于身引舟朴驚問狀易于曰方春百姓耕且蠶惟令不事可任其勞朴愧而去鹽鐵官權取茶利詔下所在毋敢隱易于視詔書曰益昌人不征茶且不可活矧厚賦毒之乎

命吏閣詔吏曰天子詔何敢拒對曰吾敢愛一身移暴於民乎不使罪爾曹即自焚之觀察使素賢之不劾也民有死喪不能具葬者以俸敕吏為辦召高年坐以問政得失凡闕民在廷易于丁寧指諭杖遣之不以付吏獄三年無囚督賦役不忍迫下戶或以俸代輸饋給往來傳符外一無所進故無異稱以中上考遷羅江令刺史裴休嘗至其邑尊侍不過三人廉約蓋資性云

欽定續通志卷五百三十

欽定四庫全書

欽定續通志卷五百三十一

循吏傳

宋

陳靖

張綸

邵晁

崔立

魯有開

張逸

吳遵路

趙尚寬

高賦

程師孟

韓晉卿

葉康直

陳靖字道卿莆田人父仁壁仕陳洪進為泉州別駕洪
進稱臣豪猾有負險為亂者靖徒步謁轉運使楊克巽
陳討賊策授陽程縣主簿契丹侵邊宋師數不利靖上
五策曰明賞罰撫士衆持重示弱待利而舉帥府許自
辟士而將帥得專制境外太宗異之改將作監丞未幾
為御史臺推勘官父喪起復秘書丞累遣太常博士太
宗務興農事詔有司議均田法靖議曰法朱易行也宜
先命大臣為租庸使或兼屯田制置仍擇三司判官通

知民事者二人為之貳兩京東西千里檢荒地及逃民
產募人耕作賜以室廬牛犂種食不足則給以庫錢別
其課為十分責州縣勸課給印紙書之分殿最為三等
凡縣管墾田三歲得課九分為下最三歲十分為中最
未及三歲盈十分為上最其最者令佐免選或超資殿
者即增選降資每州通以諸縣田為十分視殿最行賞
罰使數歲盡罷官屯田悉用賦民然後量人授田度地
均稅約井田之制為定以法頒行四方不過如此矣議

上與帝意合於是詔鹽鐵使陳恕等各選判官二人與靖議以靖為京西勸農使命大理寺丞皇甫選光祿寺丞何亮副之選等言其功難成帝猶謂不然既而靖欲假緡錢二萬試行之陳恕等言錢一出後不能償則民受害矣帝以羣議不同始罷之出靖知婺州再遷尚書刑部員外郎真宗即位復列前論且言國家禦敵西北仰食東南南食不足則誤國大計請自京東西及河北諸州大行勸農之法以殿最州縣官吏歲可省江淮

漕百餘萬復詔條上請刺史行春縣令勸耕孝悌力田者賜爵置五保以檢察姦盜籍游惰之民以供役作下三司議皆不果行歷度支判官為京畿均田使出為淮南轉運副使兼發運司公事徙河南轉運使極論前李氏橫賦於民凡十七事詔為罷其尤甚者徙知潭州歷度支鹽鐵判官累遷左諫議大夫初靖與丁謂善謂貶黨人皆逐去侍御史王耿言靖老疾於是以秘書監致仕卒靖平生多建畫而於農事尤詳嘗取淳化咸平以

來所陳表章目曰勸農奏議錄上之然其說泥古多不可行

張綸字公信潁州汝陰人少倜儻任氣舉進士不中補三班奉職遷右班殿直從雷有終討王均於蜀有降寇數百據險叛使綸擊之綸馳報曰此窮寇急之則生患不如諭以向背有終從之賊果棄兵來降以功遷右侍禁歷益彰簡等州都巡檢使所部卒縱酒掠居民綸斬首惡數人衆乃定溪峒彭氏蠻內寇以綸知辰州綸至

築蓬山驛路賊不得通乃遁去徙知渭州改內殿崇班
知鎮戎軍蠻復入寇為辰州澧鼎等州緣邊五溪十峒
巡檢安撫使諭蠻酋禍福購還所掠民遣官與盟刻石
境上久之除江淮制置發運副使時鹽課大虧綸奏除
通秦楚三州鹽戶宿負官助其罷用鹽入優與之直歲
增課數十萬石復置鹽場於杭秀海三州歲入課又百
五十萬居二歲增上供米八十萬疏五渠導太湖入於
海復租米六十萬開長蘆西河以避覆舟之患又築漕

河堤二百里於高郵北旁錮鉅石為十礎以泄橫流泰州有捍海堰延袤百五十里久廢不治歲患海濤冒民田綸議修復論者以濤患息而潦患興難之綸曰濤患十九而潦患十一獲多而忘少豈不可耶表三請願身自臨役命兼權知泰州堰成復逋戶二千六百民利之為立生祠居淮南六年累遷東上閣門使真拜乾州刺史徙知潁川卒綸有材畧所至興利除害性寬恕喜施予在江淮見漕卒凍餒道死因推奉錢市絮襦千數衣

不能自存者

邵晔字日華其先京兆人唐末曾祖岳挈族之荆南謁
高季興不見禮遂之湖南彭玕刺全州辟為判官遂家
桂陽祖崇德道州錄事參軍父簡連山令晔幼嗜學太
平興國八年擢進士第授邵陽主簿改大理評事知蓬
州錄事參軍時知州楊全性悍誣部民張道豐等三人
為盜悉置於死獄已具晔察其枉不署牘白全當核其
實全不聽既而捕獲正盜道豐等釋全坐削籍為民晔

代還引對太宗嘉之授光祿寺丞使廣南採訪刑獄歷
監察御史以母老乞就養得知朗州累遷淮南轉運使
景德中假光祿卿充交趾安撫國信使會黎桓死其子
龍鉞龍全龍廷明護等互相攻殺暕駐嶺表以事上聞
改命為緣海安撫使許以便宜暕貽書安南諭朝廷威
德俾速定位明護等即時聽命奉龍廷主軍事初詔暕
俟其事定即以黎桓禮物改賜新帥暕上言懷撫外夷
當示誠信不若俟龍廷貢奉別加封爵而寵賜之帝甚

嘉納使還改兵部員外郎賜金紫嘗上邕州至交州水陸路及宜州山川等四圖頗詳控制之要俄判三司三勾院坐所舉季隨犯贓當削一官帝以其遠使之勤止令停任大中祥待初起知兗州表請東封就命為京東轉運使封禪禮畢起拜刑部郎中復判三勾院出為淮南江浙荆湖制置發運使四年改右諫議大夫知廣州州城瀕海每蕃舶至岸常苦颶風暘鑿內濠通舟颶不能害俄邁疾卒

崔立字本之開封鄆陵人

東都事畧作許州長葛人

祖周度仕周為

秦寧軍節度判官慕容彥超叛周度責以大義遂見殺

立中進士第為果州團練推官役兵輦官物道險率衆

錢傭舟載歸知州姜從革論如率做法當斬三人立曰

此非私已罪杖兩從革不聽卒論奏詔如立議真宗記

之特改大理寺丞知安豐縣大水壞期斯塘立躬督繕

治踰月而成進殿中丞歷通判廣州許州會滑州塞決

河調民出芻槁命立提舉受納立計其用有餘而下戶

未輸者尚二百萬悉奏弛之知江陰軍屬縣有利港久
廢立教民濬治既成溉田數千頃及開橫河六十里通
漕運累遷太常少卿歷知棣漢相潞充鄆涇七州兗州
歲大飢募富人出穀十萬餘石賑之全活甚衆立性淳
謹尤喜論事大中祥符間帝既封禪士大夫爭上符瑞
立獨言水發徐州旱連江淮無為烈風金陵火天所以
警驕惰戒淫泆也前後上四十餘事以右諫議大夫知
耀州改知濠州遷給事中進尚書工部侍郎致仕卒識

韓琦於布衣以女妻之人服其鑿云

魯有開字元翰參知政事宗道從子也

按宋史魯宗道傳不載其子而

宏簡錄則稱有開為宗道子與此異

事親以孝聞好禮通左氏春秋用宗

道蔭知韋城縣曹濮劇盜橫行聞有開名相戒遁去知

確山縣大姓把持官政有開治其最甚者興廢陂溉民

田數千頃飛蝗不入境富弼守蔡薦之以為有古循吏

風知金州有蠱獄當死者數十人有開曰欲殺人衷謀

之足矣安得若是衆耶訊之果誣天方旱獄白而雨知

南康軍代還以言新法行患在異日出通判杭州知衛
州水災人乏食擅貸常平錢粟與之且奏乞蠲其息徙
冀州增隄或謂郡無水患何以役為有開曰豫備不虞
古之善計也卒成之明年河決水至隄而止朝廷遣使
何北民遮誦有開功狀召為膳部郎中元祐中歷知信
陽軍洛滑冀等州官至中大夫卒

張逸字大隱鄭州滎陽人進士及第為校書郎知鄧城
縣有能名知州謝泌薦之引對真宗問所欲何官逸對

曰母老願得近鄉募職歸奉甘旨授澶州觀察推官數日以母喪去服除特改大理寺丞知長水縣徙青神貧不自給西京留守王嗣宗雅重之假奉半年使辨裝既至興學校教生徒後邑人陳希亮楊異相繼登科縣東南有松栢灘夏秋暴漲多覆舟逸禱江神不踰月灘為徙五里時人異之再遷太常博士知尉氏縣擢監察御史提點益州路刑獄累遷尚書兵部郎中知開封府有僧求內降免田稅逸固執不許又言頃禁命婦于禁中

恩比來稍通女謁願令官司糾劾從之以樞密直學士
知益州逸凡四至蜀諳其民風華陽騶長殺人誣道旁
行者縣吏受財獄既具乃使殺人者守囚逸曰囚色寬
守者氣不直豈守者殺人乎囚始敢言而守者果服立
誅之蜀人以為神歲旱逸使作堰壅江水溉民田自出
公租減價以振民初民饑多殺耕牛食之犯者皆配關
中逸奏民殺牛以活將死之命與盜殺者異請一切放
還復其業報可未幾卒於官

吳遵路字安道父淑見文苑傳遵路性敏博學善筆札
第進士累官秘閣校理章獻太后稱制條奏十餘事語
皆切直忤太后意出知常州預市米吳中以備歲儉已
而果大乏民賴以濟自他州流至者亦全十八九歷為
淮南轉運副使兼江淮發運司事嘗於真楚泰州高郵
軍置斗門十九以備蓄泄又廣屬郡常平倉儲蓄至二
百萬以待凶歲凡所規畫後皆便之遷工部郎中坐失
按蘄州王蒙正故入部吏死罪降知洪州召修起居注

元昊反建議復民兵受詔料揀河東鄉民可為兵者諸路視以為法進兵部郎中權知開封府馭吏嚴肅屬縣無追逮雅與宋庠鄭戩葉清臣善宰相呂夷簡不悅出知宣州上御邊要畧邊防雜事二十篇徙陝西都轉運使遷龍圖閣直學士知永興軍被病猶決事不輟手自作奏及卒仁宗悼之詔遣官護喪還京師遵路夷雅慎默知大體母喪廬墓蔬食三年為政簡易不為聲威立朝敢言無所阿平居廉儉既沒室無長物其友范仲淹

分奉調其家

趙尚寬字濟之御史中丞安仁子也知平陽縣鄰邑有大囚十數破械夜逸殺居民將犯境尚寬曰盜謂我不能來方怠易取也趣尉亟往捕又遣徵巡兵躡其後悉獲之知忠州俗畜蠱殺人尚寬揭方書市中教人服藥索為蠱者置於理其俗大化轉運使持鹽數十萬斤課民易白金期會甚促尚寬發官帑副其須徐與民為市不擾而集嘉祐中以考課第一知唐州唐素沃壤經五

代亂田不耕土曠民稀賦不足以充役議者欲廢為邑
尚寬曰土可墾辟民可招徠奈何廢之及按視圖記得
漢召信臣陂渠故迹發卒疏三陂一渠溉田萬餘頃又
教民自為支渠數十轉相浸灌四方來者雲布復請計
口授田及貸民官錢買耕牛比三年榛莽復為膏腴增
戶積萬餘尚寬勤於農政治效異等三司使包拯與部
使者交上其事仁宗下詔褒獎仍進秩賜金留于唐凡
五年民為畫像以祀而王安石蘇軾作新田新渠詩以

美之徙同宿二州河中府神勇卒苦大校貪虐刊匿名書告變尚寬命焚之曰妄言耳衆乃安已而秦黜校分士卒隸他營尚寬去唐數歲田日加闢戶日益衆朝廷推功自少府監以直龍圖閣知梓州積官至司農卿卒

高賦字正臣中山人父尹右衛將軍

據東都事畧增輯

賦以父

任為右班殿直復舉進士改奉禮郎四遷太常博士歷知衢州民毛氏柴氏二十餘家世蓄蠱毒值閏歲害人尤多與人忿爭輒毒之賦悉擒治伏辜蠱患遂絕徙唐

州州田經前守趙尚寬蓄墾而榛莽者尚多賦繼其後
益募兩河流民計口給田築陂堰四十四處再滿再留
比去田增闢三萬一千三百餘頃戶增萬一千三百八
十歲益稅二萬二千二百五十七壘書褒諭宣布治狀
以勸天下衛唐兩郡為立生祠擢提點河東刑獄加直
龍圖閣知滄州程昉欲於境內開西流河繞州城而北
注三塘泊賦曰滄城近河歲增隄防猶慚奔溢矧妄有
開鑿乎昉執不從後竟不成歷蔡潞二州入同判太常

寺進集賢院學士請諸道提點刑獄司置檢法官庶專
平讞使民不寃言多施行以通議大夫致仕退居襄陽
卒

程師孟字公闢吳人進士甲科累知南康軍楚州提點
夔路刑獄瀘戎數犯渝州邊使者治所遠在萬州有警
浹日乃至師孟奏徙於渝夔部無常平粟建請置倉適
凶歲振民不足即矯發他儲不俟報吏懼白不可師孟
曰必俟報饑者盡死矣竟發之徙河東路晉地多土山

旁接川谷春夏大雨水濁如黃河可溉灌師益勸民出
錢開渠築堰溉良田萬八千頃哀其事為水利圖經頒
之州縣為度支判官知洪州積石為江隄浚章溝揭北
閘以節水升降後無水患判三司都磨勘司接伴契丹
使蕭惟輔曰白溝之地當兩屬今南朝植柳數里而以
北人漁界河為罪何理也師孟曰兩朝當守誓約涿郡
有案牘可覆視君舍文書滕口說詎欲生事耶惟輔愧
謝出為江西轉運使盜發袁州州吏為耳目久不獲師

孟械吏數輩送獄盜即成擒加直昭文館知福州築子
城建學舍治行稱最徙廣州州城為儂寇所毀方伯踵
至皆言土疏惡不可築師孟在廣六年作西城及交阯
陷邕管聞廣守備固不敢東時師孟已召還朝廷念前
功以為給事中集賢殿修撰判都水監賀契丹生辰至
涿州契丹命席迎者正南向涿州官西向宋使价東向
師孟曰是卑我也不就列自日昃爭至暮從者失色師
孟辭氣益厲叱儼者易之於是更與迎者東西向明日

涿人錢于郊疾馳過不顧涿人移雄州以為言坐罷歸
班復起知越州青州遂致仕以光祿大夫卒師孟為政
簡而嚴罪非死者不以屬吏發隱擿伏如神得豪惡必
痛懲艾之所部肅然洪福廣越為立生祠

按宋史程師孟傳所見一

載列傳第九十一載循吏傳中考師孟居官所至皆有惠政治行稱最以為循吏固無媿也今刪彼存此

韓晉卿字伯修密州安邱人幼誦書日數千言長以五
經中第歷肥鄉嘉興主簿通判應天府知同州壽州奏
課第一擢刑部郎中初開封民爭鶉殺人王安石以為

盜拒捕殺之無罪晉卿爭之曰是閹殺也登州婦人謀殺夫郡守許遵執為按問即承當減等論安石復主之晉卿以謀殺罪當死終持之不肯變用是知名元豐置大理獄多內庭所付晉卿持平考核無所上下神宗稱其才嘗被詔按治寧州獄故事當入對晉卿曰奉使有指三尺法具在豈應伺候主意輕重其心乎受命即行諸州請讞大辟執政惡其多將劾不應讞者晉卿曰疑獄上請求所以生之也苟請讞而獲譴後不來矣議者

又引唐日覆奏欲令天下庶獄悉奏決晉卿言祖宗之制可疑可矜者乃許上請若四方庶獄俱繫以聽命恐自今瘼死多于伏辜者矣朝廷皆行其說故士大夫間推其忠厚不可以法家名之元祐初為兩浙轉運使時差役法復行諸道處畫多失叙晉卿獨視民所宜而不

戾法指

按元祐復差役法為哲宗朝事宋史本傳誤載于元豐之前今更正

入為大理卿

卒於官

葉康直字景溫建州人擢進士第知光化縣縣多竹民

編為屋康直教用陶瓦以寧火患凡政皆務利民時豐稷為穀城令亦以治績顯人歌之曰葉光化豐穀城清如水平如衡會布行新法以為司農屬歷陝西轉運副使五路兵西征康直領涇原糧道承受內侍梁同以餉惡妄奏神宗怒械康直將誅之王安禮力救得歸故官元祐初加直龍圖閣知秦州中書舍人曾肇蘇轍劾康直詢事李憲免官究實無狀改知河中府徙秦州夏人侵甘谷康直戒諸將設伏以待殲其二酋自是不敢犯境

進寶文閣待制陝西都運使以疾請知亳州通濬積潦民
獲田數十萬畝召為兵部侍郎卒

欽定續通志卷五百三十一

欽定四庫全書

欽定續通志卷五百三十二

循吏傳

遼

大公鼎

蕭文

馬人望

耶律都勒幹

大公鼎渤海人先世籍遼陽率賓縣統和間以豪右實
中京因徙大定曾祖忠禮賓使父信興中主簿公鼎幼

莊愿長而好學咸雍十年登進士第調瀋州觀察判官
時遼東雨水傷稼北樞密院大發瀕河丁壯以完隄防
有司承令峻急公鼎獨曰邊陣甫寧大興役事非利國
便農之道疏奏其事朝廷從之罷役水亦不為災改良
鄉令省徭役務農桑建孔子廟學部民服化累遷興國
軍節度副使時有隸鷹坊者以羅畢為名擾害田里歲
久民不堪公鼎言于上即命禁戢會公鼎造朝大臣諭
帝嘉納之意公鼎曰一郡獲安誠為大幸他郡如此者

衆願均其賜于天下從之徙長春州錢帛都提點車駕如春水貴主例為假貸公鼎曰豈可輟官用徇人情拒之頗聞怨詈語曰此吾職不敢廢也俄拜大理卿多所平反天祚即位歷長寧軍節度使南京副留守改東京戶部使盜殺留守蕭保先因而倡亂公鼎單騎行郡陳以禍福衆皆投兵而拜曰是不欺我皆聽命安輯如故拜中京留守賜貞亮功臣乘傳赴官時盜賊充斥有過于路者即叩馬乞自新公鼎給以符約俾還業聞者接

踵而至不旬日境內清肅天祚聞之加賜保節功臣時
人心反側公鼎慮生變請布恩惠以安之為之肆赦公
鼎累表乞歸不許會奴賊張薩巴率無賴嘯聚公鼎欲
擊而勢有不能嘆曰吾欲謝事久矣為世故所牽不幸
至此豈命也夫因憂憤成疾保大元年卒子昌齡左承
制昌嗣洛州刺史昌朝鎮寧軍節度

蕭文字國華外戚賢者也父直善安州防禦使文篤志
力學喜愠不形太康初掌秦越國王中丞司事以才幹

稱尋知北面帖黃王邦彥子爭廕數歲不能定命文詰
之立決承詔閱習儀衛執事林林指顧如一遷同知奉
國軍節度使歷國舅都監壽隆末知易州兼西南面安
撫使高陽土沃民富吏其邑者每黷于貨民甚苦之文
始至悉去舊弊務農桑崇禮教民皆化之時大旱百姓
憂甚文禱之輒雨屬縣又蝗議捕除之文曰蝗天災捕
之何益但反躬自責蝗盡飛去遺者亦不食苗散在草
莽為鳥鵲所食會霖雨不止文復隨禱而霽是歲大熟

遷唐古部節度使高陽勒石頌之後不知所終

馬人望字儼叔高祖胥鄉為石晉青州刺史太祖兵至
堅守不降城破被執太祖義而釋之徙其族于醫巫閭
山因家焉曾祖廷煦南京留守祖淵中京副留守父詮
中京文思使人望穎悟幼孤長以才學稱咸雍中第進
士為松山縣令歲運澤州官炭獨役松山人望請于中
京留守蕭托歡均役他邑托歡怒下吏繫幾百日復引
詰之人望不屈蕭喜曰君為民如此後必大用以事聞

于朝悉從所請徙知涿州新城縣縣與宋接境驛道所
從出治不擾吏民畏愛擢中京度支司鹽鐵判官轉南
京三司度支判官公私兼裕遷警巡使京城獄訟填委
處決無寃者會檢括戶口未兩旬而畢同知留守蕭保
先怪而問之人望曰民產若括之無遺他日必長厚歛
之弊大率十得六七足矣保先謝曰公慮遠吾不及也
天祚嗣位詔與蕭報恩究伊遜害太子事平心以處所
活甚衆改上京副留守會劇賊趙鍾哥犯闕劫宮女御

物人望率衆捕之右臂中矢炷以艾力疾馳逐賊棄所掠而遁人望令關津譏察行旅悉獲其盜尋擢樞密都承旨宰相耶律儼惡與己異遷南京諸宮提轄制置歲中為保靜軍節度使有二吏兇暴民畏如虎人望發其事黥配之是歲諸處饑乏惟人望所治粒食不闕路不鳴桴遥授彰義軍節度使遷中京度支使始至府廩皆空視事半歲積粟十五萬斛錢二十萬緡徙左散騎常侍累遷樞密直學士未幾拜參知政事判南京三司使

事錢粟出約之弊惟燕為甚人望以縑帛為通歷凡庫物出入皆使別籍名曰臨庫姦人黠吏莫得軒輊乃以年老揚言道路朝論不察改南院宣徽使以示優老踰年天祚手書召之既至拜南院樞密使人不敢干以私當時民所甚患者驛遞馬牛旗鼓鄉正廳隸倉司之役至破產不能給人望使民出錢官自募役時以為便久之請老以守司徒兼侍中致仕卒諡文獻人望有操守喜怒不形未嘗附麗求進初除執政家人賀之人望愀

然曰得勿喜失勿憂抗之甚高擠之必酷其畏慎如此
耶律都勒幹字伊實音季父房之後廉約重義重熙末
給事誥敕院咸雍中累遷同知南京留守事被召部民
懇留賜詔褒獎太康初改西南面招討使為北面林牙
遷左伊勒希巴大安五年拜南府宰相壽隆初致仕卒
都勒幹所至有聲吏民畏愛及退居鄉里子布庫為烏
爾古部節度使遣人來迎既至見積委甚富謂布庫曰
辭親入仕當以裕國安民為事枉道欺君以苟貨利非

吾志也命駕而歸布庫後為盜所殺

按此下原有楊遵
勗王業二傳一取

其決事如流一取其練達朝政
于循吏名實不協今改入列傳

欽定續通志卷五百三十二

欽定四庫全書

欽定續通志卷五百三十三

循吏傳

金

盧克忠

牛德昌

范承吉

王政

張奕

李瞻

劉敏行

傅慎微

伊喇溫

劉煥

高昌福

孫德淵

趙鑑

富察鄭留

鈕祐祿守愚

舒穆魯元

張教

趙重福

武都

赫舍哩德

張特立

王浩

盧克忠貴德州鳳集人高永昌據遼陽走詣幹魯營降
遂與渤海人托卜嘉追獲永昌弑國二年授世襲穆昆
後定燕伐宋皆與有功歷除登瀛二州刺史天德間遷
同知保大軍節度使有軍卒自綏德州過郡城宿民家

至夜主人被劫有司執假宿卒繫獄榜掠誣服克忠察其寃獨不肯署未幾果得真賊釋之大定二年除北京副留守會民艱食下令凡有蓄積者計留一歲悉出平糶賴無損瘠患轉陳州防禦使至靜難軍節度使致仕卒

牛德昌字彥欽蔚州定安人父鐸遼將作大監德昌少孤母教之學有勸就蔭者母以遺命不從皇統二年登進士調礮山簿遷萬泉令屬蒲陝薦饑羣盜充斥城門

晝閉德昌到官即縱百姓出入榜曰民苦饑寒剝掠鄉聚以偷旦夕之命甚可憐也能自新者一不問賊皆感激解散縣境以安府尹王伯龍嘉之禮待甚厚累官刑吏二部侍郎廣寧太原尹卒贈中奉大夫

范承吉字寵之好問學遼季盜起雖避地未嘗廢書天慶八年登進士歸朝為殿中少監從攻太原遷少府監宗翰克宋所得金珠承吉司其出入無毫髮欺及還積車載書史而已尋遷昭文館直學士知絳州使吏遍諭

有因軍興為將士掠而逃歸者皆自贖白元帥府凡數千悉贖為良貧無資者以公厨代輸改河東北路轉運使時承宋弊民賦繁重乃為經畫立法簡便官既足而民有餘歷遷順天軍節度使屬地震壞民廬舍匠以爭先營葺過取其直命官屬董之先後以次貧富皆省費歷鎮西秦寧二軍節度使復鎮順天奚卒散居境內為盜一繩以法不少貸懼不敢犯貞元二年以光祿大夫致仕卒

王政辰州熊岳人高永昌據遼東知政材畧欲用之辭
不就永昌敗渤海人爭縛以為功政獨引退吳王棟摩
異之言於太祖授盧州渤海軍穆昆從破白霄下燕雲
及代宋滑州降留為安撫使前此數州既降復殺守將
反為宋守及是人以為政憂政曰苟利國家雖死何避
從數騎入州釋飢民為盜坐繫者發倉廩以賑民皆悅
不復叛帝聞之多歸降除同知金勝軍節度使事改
權侍衛親軍都指揮使魚掌軍資明會計嚴扃鑄金帛

小積而出納無錯銖失棟摩戲之曰汝為官久而貧不加富何對曰政以楊震四知自守安得不貧天眷元年遷保靜軍節度使致仕卒政本名諾色爾嘗使高麗因改名子遵古有傳

張奕字彥微澤州高平人仕齊為歸德府通判齊國廢偵知兵二萬謀為亂約夜半舉燎相應選市丁結陣要巷亂不得作比明亡匿畧盡擒誅首惡都統完顏倫布軍至欲根株餘黨奕以闔門保之遂止行臺承制除同

知歸德尹歷陳秦州防禦使同知太原尹晉寧軍報夏人侵界詔往征至境按籍各歸所侵土還奏折氏世守麟府以抗夏人本朝有其地遂以與夏夏人夷其墳壠折氏怨入骨髓不得報今復使守晉寧故激怒夏人欲開邊釁以雪私讐耳可徙之他郡則夏人自安從之移折氏守青州大定二年為戶部尚書卒

李瞻薊州玉田人遼天慶二年進士為平州望雲令張覺據州叛以瞻從事宗望復平州覺亡去城中復叛瞻

踰城出降其子為賊所害宗望承制以為興平府判官
累遷德州防禦使為政寬平民懷其惠詣京師請留者
數千人遷忠順軍節度使正隆末盜賊蠹起增築城壘
為備蔚人以安大定初卒于官

劉敏行平州人天會三年進士累遷肥鄉令歲大饑盜
賊掠人為食民入保郡城農事荒廢敏行白州借軍士
三十護民出耕多張旗幟為疑兵敏行率軍巡邏日暮
則閱民入城由是盜不敢犯而耕稼滋殖轉高平令城

犯久不修大盜橫恣縣鎮不能禦敏行率僚吏出俸錢
催役繕治百姓欣然從之版築遂完賊至不能犯累遷

河北東路轉運使致仕卒

傅慎微字幾先其先秦州沙溪人後徙建昌慎微遷居
長安宋末登進士累官河東路經制使羅索定陝西率
衆迎戰兵敗被獲宗翰愛其才弗殺羈置歸化州宗弼
復取河南用為陝西經畧使尋權同州節度使事明年
大旱擢京兆鄜延環慶三路經濟使許以便宜慎微募

民入粟立養濟院全活甚衆改同知京兆尹權陝西諸路轉運使修三白龍首等渠溉田募民屯種貸牛種民賴其利累遷太常卿除定武軍節度使移靜難軍忤用事者蘇保衡救之得免大定初遷禮部尚書兼修國史卒于官慎微博學喜著書嘗奏興亡金鏡錄一百卷伊喇溫本名阿薩爾遼橫帳人工契丹小字膺宗為左副元帥伐宋溫從大臭渡江辟江寧府都巡檢江寧太平初下宋遣謀人扇構百姓應者數萬人溫擒其謀者

遂不敢竊發宗弼嘉之每出征伐嘗在行間除同知河北西路轉運使事會宗弼巡邊溫從軍不之官宗弼入朝熙宗宴羣臣宗弼欲有奏請已被酒失次溫掖而出宮明日熙宗謂宗弼曰阿薩爾事叔甚謹不可去左右由是宗弼益親信之嘗謂女婿赫舍哩志寧曰汝可效阿薩爾之為人也可以幾古人矣未幾除同知中京路都轉運使事累遷左諫議大夫兼修起居注正隆時從伐宋以本官為濟州路行軍萬戶軍還除同知宣徽院

事世宗御饌不過口名温嘗之奏曰味非不美也蓋南
北邊事未息聖慮有所在耳帝意遂釋歷永定震武崇
義節度使移臨海軍州治近水秋雨潦暴至城下城
頗決百姓惶駭不知所為温躬督役夫繕完之雖臨不
測無所避僚屬或止温温曰為政疢癘水泛溢為災守
臣之罪當以此身為百姓謝雖死不恨移鎮武定歲旱
且蝗温割指以血澀酒中禱而酌之既而雨霑足有羣
鴉啄蝗且盡由是歲熟人以為至誠之感云以老致仕

卒

按伊刺溫雖屬武臣而治有異政金史原係列傳今移入循吏

劉煥字德文中山人宋末兵起城中乏食煥尚幼煮糠
覈自飲其清者以釀厚供母鄉里異之長就學寒擁糞
火讀書不怠登天德元年進士調任邱尉縣令貪汙規
正之秩滿令謝曰尉廉慎使戎獲考調中都市令樞密
使布薩呼圖家有僕結工牟利於市不肯從市役煥繫
之呼圖召煥不往暴工罪笞之以廉升京兆推官再遷
北京警巡使捕二惡少杖于庭衆憚毋敢犯召為監察

御史父老數百人或卧車下或挽其靴銜欲留不得攝
戶部員外郎朝廷惠代州錢惡民多盜鑄抵罪下尚書
省議煥奏錢寶純用黃銅自代州取青四六雜糅務省
銅而功易就由是民間盜鑄陷罪者衆非朝廷意也必
欲為天下利宜純用黃銅得數少而利遠其新錢已流
行者驗數輸納準換從之再遷管州刺史耆老復疏其
著蹟十一事詣節鎮請留升鄭州防禦使轉同知北京
留守事世宗幸上京所過州郡大發民夫治橋梁馳道

以希恩賞煥所部惟平治端好而已帝嘉其意遷遼東路轉運使卒

高昌福中都宛平人父履遼御史中丞致仕太宗聞其名召見未及而卒昌福登天會十年進士辟元帥府令史皇統初宗弼治汴獲人有疑似者輒目為宋謀殺之昌德讞得實釋去甚衆許州都統韓常嚴酷好殺遣吏送囚於汴武道亾吏自度得罪欲盡殺諸囚以滅口昌福窮竟其狀免死者十七八諸吏遂怨欲構害之會帥

府選人傾宋兵動靜即遣以行昌福不辭盡得虛實還
報師還除震武軍節度副使天德間改絳陽軍節度副
使入為兵部員外郎改河間少尹世宗即位上書陳便
宜事帝披閱再三因謂侍臣曰此可以知內外人材優
劣三除同知東京留守事治最遷山東西路轉運使工
部尚書改彰德軍節度使累遷河中尹致任卒

孫德淵字資深興中州人大定十六年進士為沙河令
有盜秋桑者主逐捕之盜自刺其足面曰秋桑例不禁

採汝何得刺我主懼賂求免盜不從許之縣德淵曰若
逐捕而傷瘡必在後今在前乃自刺也遂引服父憂去
民刻石祠之累遷昭義軍節度使潞州破被執有拜于
前者皆沙河舊民也密護得脫貞祐二年拜工部尚書
攝御史中丞時山東乏兵食有司請鬻恩例舉人居喪
者許納錢就試德淵奏此大傷名教事遂寢尋致仕監
察御史許古論德淵忠亮明敏可大用願朝廷起復必
能建明以利國家宣宗嘉納未及用而卒

趙鑑字擇善濟南章邱人宋建炎二年進士調廬州司理參軍以江淮方用兵棄官還鄉里齊國建除歷城丞轉長清令皆劇邑治政甚著遷真秘閣提舉涇原路弓箭手兼提點本路刑獄原州守將武悍自用以鑑年少易之鑑發其姦坐免郡縣聞風無敢犯齊廢改山東東路轉運副使攝行臺左司郎中宰相欲以故宋官者權都水監鑑曰誤國闔豎汴人視為寇讐付以美官將失人望遂不用大定初知寧海軍秋禾方熟蟲生鑑出城

行視蟲乃自死再遷河北西路轉運使致仕卒

富察鄭留字文叔東京路威泰必喇明安人大定二十二年進士累官順義軍節度使西京人李安兄弟爭財府縣不能決按察司移鄭留平理月餘不問會釋奠孔子廟乃引安兄弟與諸生齒坐會酒陳說古友悌數事兄弟感悟謝曰節使父母也相讓而歸朔州多盜鄭留禁游食蓄兵器因行春撫諭之盜息獄空改利涉軍節度使詔括馬鄭留使百姓飼養以須御史劾之既而伐

宋諸路括馬皆瘦惟隆州馬肥乃釋大安三年知慶陽
府事擊走夏兵至寧元年改知平涼府時平涼新被兵
夏人復來攻招潰卒禦守夏兵退遷官四階貞祐二年
改東京留守致仕卒鄭留重厚寡言笑人不見其喜愠
臨終取奏藁盡焚之

鈕祜祿守愚字仲晦本名和倫克們真定府路烏濟赫
明安人六歲知書性至孝父沒時年十五營葬如禮治
家有法鄉人稱之登明昌二年進士為臨沂令有不逞

輩五百人結黨大擾境內守愚下車皆散去蝗起莒密
間獨不入臨沂境先是朝廷括河朔山東地隱匿者沒
入官告者給賞莒州刺史教其奴告臨沂人冒地先給
賞官鏹後徵于民積三百萬守愚列其寃狀白州州不
為理即聞于戶部而徵還之流民歸業勤其事于石改
祕書郎母喪勺飲不入口三日終喪未嘗至內寢貞祐
中累遷翰林學士參議陝西路安撫司事安撫完顏弼
重其為人每事咨而後行未幾有疾三年卒

舒穆魯元字希明懿州路呼圖克明安人七歲喪父號泣不食者數日十三居母喪如成人補譯史累監察御史同知淄州軍州事劇盜劉竒久為民患捕獲方訊鞠聞赦將至亟命杖殺之闕郡稱快累遷山東西路按察轉運使貞祐初徵兵東平洪果烏登擁衆不進大括民財衆皆忿怨副統布薩素赫殺烏登佩其符縱恣尤甚元密疏劾之素赫坐誅移知濟南府到官六月卒元生平寡言笑尚節儉居官自守不文權要人以是稱之

張穀字伯英許州臨潁人大定二十八年進士為同州
觀察判官時出兵備邊州徵箭十萬限以鷗雁羽價翔
躍不可得穀曰矢去物也何羽不可節度使曰當須省
報穀曰州距京師二十里如民急何萬一有責穀任其
咎一日間價減數倍尚書省竟如所請累遷河東南路
轉運使權行六部尚書安撫使興定元年卒穀天性孝
友任子悉先諸弟俸入亦委弟掌之未嘗問有無云

趙重福字履祥豐州人通女真大小字試補女真誥院

令史累遷同知陳州防禦事宋謀人蘇泉入河南重福
迹之至魚臺將渡河見前舟且渡令從者大呼泉姓名
泉惶惶失措遂執之改滄州鹽副使歲饑民煮鹵為鹽
賣以給食官往往杖殺之重福曰寧使課殿不忍殺人
歲滿當降尚書右丞完顏匡三司使安春知其事乃以
歲荒薄其罰除織染署令大安三年佐戶部尚書張煒調
兵食于古北口遷都水少監行西北路六部郎中治密
雲縣貞祐二年以守密雲功遷同知河間府事三年河

間被圍有劉中者嘗在密雲與聯事勸出降不聽時兵
少多羸疾重福勸父老率其子弟强者戰弱者守會久
雨圍乃解去遷河東北轉運使致仕元光二年卒

武都字文伯東勝州人大定二十二年進士調商水令
縣素多盜凡縱火行劫推埋發冢者都皆廉得姓名榜
通衢悉奔他境累遷灤州刺史入為戶部郎中權右司
郎中奏事稱旨被詔由海道漕遼東粟賑山東高其價
直募致海賈船三遷中都西京按察副使遷按察使行

西南路六部尚書佐元帥穆延盡忠備禦西京有勞中
都戒嚴知大興府佩虎符便宜行事坐被酒以褻衣見
詔使解職起為刑部尚書中都解圍為河東路宣撫使
興定元年卒

赫舍哩德字廣之真定路珊沁明安人明昌二年進士
累官肇州防禦使肇州升武興軍德為節度使宣撫司
肇州圍急食且盡有糧三百船在鴨子河去州五里不
能至乃浚濠增陴築甬道導濠水屬之河鑿陷馬竄伏

甲其旁拒守一日兵數接士殊死戰渠成船至兵食足
圍乃解改遼東路轉運使軍民遮道挽留乘夜乃得去
布希萬努逼上京與部將劉子元戰却之遷東京留守
歷保靜武勝軍節度使興定三年以節度權元帥右都
監與完顏仲元俱行元帥府于宿州遷工部尚書五年
召還中都卒

張特立字文舉曹州東明人

按元史隱逸傳稱特立初
名承以避諱改今名曾為

僱師主簿
本傳未詳

泰和三年進士調宣德州司候郡多皇族巨

室一律以法闔境肅然調萊州節度判官不赴躬耕杞
之韋城以經學自樂正大初因侯摯師安石薦授洛陽
令尋拜監察御史上言鎬厲二宅久加禁錮近降赦恩
謀反大逆皆蒙湔雪彼獨何罪幽囚若是世宗神靈在
天得無傷其心乎聖嗣未立未必不由此也又言方今
三面受敵百姓凋敝宰執非才恐中興難期尚書右丞
延扎舒魯遣奴與小民爭田失大臣體參政圖克坦烏
登諂事近習得位皆宜罷當路者忌其直陰思擠之會

勅省掾高楨等受請託飲娼家時平章博索犒軍陝西
歸楨等泣訴于道以不劾同席省掾王賓為私且不實

左遷邳州軍士判官杖五十士論皆惜其去後卒

按元史隱

逸傳載元世祖以特立養素邱園易代如一賜號中庸先生屢降璽書褒異今以通例無庸復出剛彼存此而

附識之

王浩由吏起身初辟涇陽令廉能為關輔第一時西臺
檄州縣增植棗果督責嚴急民甚擾浩獨無所問主司
將坐之浩曰縣植已滿數若欲增必盜他人所有取彼

置此未見其利其愛民多此類所在有善政民絲毫無
犯秦人為立生祠南遷後為扶溝令開興元年民錢大
亨等執縣官送款于元以浩有恩於民不忍加刃日遣
所知勸之降終不聽殺之無血主簿劉坦尉宋乙並見
害棄屍道路自春徂夏獨浩屍儼然如生目且不瞑烏
犬莫敢近殆若有神護者初辟舉法行縣官甚多得人
如咸寧令張天綱長安令李獻甫洛陽令張持立三人
有傳餘如興平帥夔臨潼武天禎汜水黨君玉偃師王

登庸高陵宋九嘉登封薛君中長社李天翼河津孫鼎
臣邾城李無黨滎陽李過庭尉氏張瑜長葛張子玉猗
氏安德璋三原蕭邦傑藍田張德直葉縣劉從益皆清

慎才敏極一時之選

按金史循吏自盧克忠以下二十一人又附載師夔以下十六人然

如熙宗朝杜遵晦世宗朝史蕭察廉爽然舉首且不與亦未見於他傳則其道失者多矣又附載中劉從益宋九嘉金史已入文藝傳而止云張天綱李獻甫張特立三人有傳非也謹識於此

欽定續通志卷五百三十三